

中國方志叢書·華中地方·第四二六號

據

清·黃印輯
乾隆十七年修，光緒二十二年刊本

影印

江蘇省

錫金識小錄

(一)

成文出版社有限公司印行



10097959

8920717

中國方志叢書·華中地方·第四二六號


據清黃印輯
乾隆十七年修，光緒二十二年刊本

影印

江蘇省

錫金識小錄

(一)



成文出版社有限公司印行



中華民國七十二年三月臺一版

錫金識小錄 共二冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市杭州南路一段6巷9號3F

電話：三九一六四一六（五線）

印刷者：上林彩色印刷有限公司

台北市大理街145號

新聞局出版登記證：局版台業字第1143號

余承乏梁溪既下車尋覽邑志見注引識小錄云云欲觀其全
 書不可得久之友人得鈔本相示其大端有裨考證者已纂入
 志此外微言軼事窮搜博採類而列之時雜出以諸譴然至陳
 厯官此者之賢否政治之得失民生之利病習俗之醜靡剴切
 詳盡法戒炯然作者殆有深心乎夫文獻無徵聖人所慨得遺
 編而表章之爲邑人士勸固官斯土者責也迺亟屬同志鳩資
 刊行書既成請序余謂錫金古稱壯縣著述家指不勝屈其書
 之顯晦有時固亦有幸不幸獨是書抑久不彰咸以所紀淑慝
 並存之故夫人非至聖孰能無過過而不爲曲諱蓋近於春秋
 責賢者備之義語曰小人之過也必文孟子曰君子之過也如
 日月之食焉人皆見之是則君子不能無過也明矣且有過而

不求文也亦明矣奇偉非常之士固有細行不矜爲世俗詬厲或猜忌而謗興或求全而毀來一時傳播浸以失真後之紀所聞者初不遑計其事之有無言之得失蓋往往而是然則是錄也謂遂足據爲定論可乎余嘗謂今世學者觀古人行事及古人論說二者辨其大體之邪正而已大純矣小疵不掩無傷也執其非並疑其是因所惡遂及所好君子交譏焉以未當乎人心是非之正好惡之公耳余方懼當官寡效虛美之熏心而吾過之不盡聞也時覽是錄以自儆更導揚其義以質邦人士之敦行好古者至錄中事不盡足徵紀者固知之矣曰識小蓋已託於野史云光緒丙申三月皖太湖王念祖敘

序

國有史邑有志正也稗官野乘爲說家流別出者也晉宋以降
雜錄滋多或鑿空駕虛采取謬悠瑰瑋連抃而無故實失在不
信或挾怨逞私恣其筆鋒好生羽毛惡成瘡痍失在不公又或
緣飾附會描繪過情博而溺心詞乃晦意詳核則多舛謬參觀
未免雷同失在不雅文人操觚苦健流傳藝林其弊足以變黑
白而亂是非故雖稗官野乘亦必託之有道能文者然後無不
信不公不雅之病而爲國史邑志之助夫邑志之體本於史而
邑志之難信甚於史國史善惡並載是非功罪明白顯著不可
假借若易代之後忌諱不必避請託無所施然猶有不韙於公
論者志以揚善爲主苟非大千清議無由湔洗後人皆得據諛

纂之詞求人記載末流善謗直筆易撓繁稱夸辭買菜求益業已輿輪不孚而猶未鑒子孫之腹誰肯爲衆射的以召闢取怨哉至於時政利弊及遺言瑣事則或有關於當道限於體制有不得悉載者其闕逸亦爲不少矣夫惟有道能文之士虛心討論採摭前聞參酌時事必核實語必雅馴雖搜訪不越桑梓抑亦邑志之羽翼也吾邑自前明以上先哲代有記識邑志藝文所載約十數家然五書篋萃既燬於火而嘉隆以下若尤氏談氏所續錄亦多殘缺不完故家既鮮藏書近代罕勤撰述帖括日盛文獻益微流風餘韻日就湮沒君子惜之乾隆庚午邑侯王公鳳巢延浦先生二田華師豫原伯氏震滄及子四人共修邑志自前志外徧徵逸書僅得數種中表兄黃君堯咨見之

恐其散佚乃裒集而類次焉蓋以近事凡子史文集有及邑事者亦多摭入及志成黃子以事之有關民俗利害而志未及載或載而未詳者別出手眼另成二卷補遺訂誤而於民生艱窘之故每三致意焉深識遠慮非僅識諸軼事者所能見及也合之得十有二卷顏曰錫金識小錄可以知黃子之志矣夫國史邑志慮有人之見者存故梗避多裨官野乘患有己之見者存故立說不能無偏陂黃子讀書有識尤邃於易學今爲是書人我之見兩忘防流弊彰幽隱勵末俗端風化與志相輔並行不信不公不雅之弊吾知免矣黃子以書屬余序余因識其卷首願觀是書者其寶之時乾隆十七年歲次壬申三月中浣中表弟雙溪顧奎光序

廻谷黃君傳

君姓黃氏名印字堯咨七世祖斗南公諱正色明太僕卿以直諫杖戍傳在明史君爲人質直負氣其學艱苦潛思獨契不屑蹈襲尤邃於易理十六年始成書今所藏讀易質疑是也君家貧踰冠授經鄉里中徧讀先儒書徹夜靜坐正容矩步侃侃跼繩尺或目笑之弗顧也補諸生連試高等乾隆辛酉鄉試君文已中式會兩主司議牴牾竟落之甲子後不復應試弟子日進嘗再應聘遊中州還需次貢太學踰三年而卒君友愛弟斯皇亦諸生婦歿君撫其子女與已子女同寡嫂祝氏無子君以長子子之養之終身家無間言性儉無他嗜好布衣糲食讀書談道愉愉如也所居老屋三楹寢室庖湏咸在紡車織具鍼管刀

尺縱橫錯置子女嘖笑滿前君但危坐持一編雜誦不少休其
論文剔抉指摘無隱諱有所辨難而赤目張必伸已見衷諸是
而後已時出著撰示人且讀且自贊以手按紙而顛遇所得意
輒踴躍不自禁持君之讀易有會於既有典常不可爲典要之
旨疏通貫串數易稿乃定學者爭鈔傳之江陰卞生景純者亦
善易得君質疑本尊信之寢食與俱繼而爲人取去病革時猶
念是書不置君自中州聞之泫然流涕曰是吾知己也君所集
有錫金識小錄都載邑中遺事古文不多作皆有法度

論曰君祖斗南公戍遼陽日貽書唐荆川言在戍所日課一詩
荆川復之曰日課一詩不如日玩一爻公遂閉戶讀易君之深
於易也蓋其家學哉 國家特舉經術湛深之儒以備顧問應

舉者彬彬矣顧不及君然君經明行修所著質疑實可傳君子務實學焉已矣

君爲予中表兄年長於予予所作文字輒質君君指摘瑕玆無少回互君有著述亦必示予令點定之予少時習爲詩古文南沙秦師弗與也獨令讀薛文清讀書錄暨家端文公高忠憲公書君亦勉以居敬主靜之學予迺知詞章記誦與身心無益自有向上事矣君後讀易每有心得輒索予喜色相告予或應他事則隨而東西走必竟其說太孺人見君來常笑曰堯咨復來講易經矣君自學舍歸輒過予家見案上書卽取坐閱之家人喚之飯乃去飯訖復來恒竟日乙丑予登第在都應聘至晉陽書院爲山長家中人皆以不卽用爲憾

金三司人金二
君獨爲太孺人言雙溪弟年少正宜學問竟不朽計汲汲求
官甚無謂也予自晉陽歸復與君相切磋者三年君好講說
微護前人予與語或挂塞之亦不肯驟屈服予嘗謂其談論
多恐傷氣宜稍默君多病頗韙予言然弗能改也癸酉予謁
選君至林縣正月中偕至淮上於紅花埭分道別去自是不
復見君矣丙子冬君自家答子書曰伏讀來札反覆展玩不
能置洵有味乎其言之也今仕宦者其肯吐此語存此心耶
只此一點心民當受其福矣雙溪識高守定外通而中介僕
所欽服然官惟州縣親民官最難爲願雙溪之日慎一日也
蓋今日州縣纖悉必具詳實無事不欺隱大吏明知之而樂
其掩覆誠如張釋之云徒文具而無惻隱之實者昔濂溪明

道皆嘗爲令假使處今之時亦將隨俗以負此心耶設不負此心其能一日安於其位耶古者守令皆得自專故貪污者得逞欲而循良者亦有以自展今事多牽掣故不肖者不敢恣肆而賢能者亦無以見其長雙溪所云不懈事不生事者誠與民休息隨時自盡之道設誠致而行之毋墮於時趨毋惑於細人之投合在雙溪勉之而已浮榮有盡令聞無窮微雙溪僕未敢吐此言也丁丑君復致札於予欲爲質疑序書詞淒楚予恐君不久於世而君未幾病歿矣予從其家鈔質疑以來君之子祐尊書來言君病革時遺言謹藏是書務得雙溪序其前吾存時所誣諉者也予吏事牽挽不及爲序而爲君小傳并言予中表間相切劘之誼如此嗟乎直諒多聞

之友如君者其可多得乎哉中表弟顧奎光拜譔

錫金識小錄例言

一茲錄爲邑志外編邑志之體宜簡嚴莊雅茲則雅俗兼取奇正並收意在旁搜不厭瑣屑亦其體然也補遺缺參異同或於是有取焉

一事有繫於民俗利病而志不及載者或礙於當途限於分類非必盡由於疏漏也而要不可缺焉弗詳如彙追始末漶弊興革社倉鄉約保甲關柵之類是也其或過求簡約致脫誤不明而所係實鉅者如田糧民役之類是也愚推此類爲備參二卷補志之缺訂志之訛於民生艱窘之故尤惓惓焉凡有糾正者亦併附入

一諸軼事自明萬厯以上多本前人記載明季至國朝時代

近而事多闕由記錄者少也追憶故老所傳參以見聞所及約得十之三焉合爲一書庶前後事蹟畧可觀覽

從來志軼事者多不以類次誠以事既紛雜分類爲難然觀者每苦其繁亂予按諸書所載事之繫於地者約十之一繫於人者約十之九茲畧爲部署有地可繫者統以舊蹟一門屬於人者則以人爲等差而事從之庶幾各有條理而亦不失於煩碎

諸書所載其人可入邑志者另爲補傳一卷近有見聞真確者亦登之以寓微顯闡幽之義至邑志已有傳而逸事尙多或其人可不載而事有可采自名賢邑紳以至閨媛各以類次不必專揚懿美可以廣異聞備故實者亦錄焉惟科名或